

Na osnovu člana 22 Statuta Brčko distrikta Bosne i Hercegovine (Službeni glasnik Brčko distrikta BiH, broj 17/08), Skupština Brčko distrikta Bosne i Hercegovine, na 7. redovnoj sjednici održanoj 10. juna 2009. godine, usvaja

ZAKON O IZMIRENJU OBAVEZA PO OSNOVU RAČUNA STARE DEVIZNE ŠTEDNJE EMISIJOM OBVEZNICA U BRČKO DISTRIKTU BOSNE I HERCEGOVINE

DIO PRVI - OPĆE ODREDBE

Član 1 (Predmet)

(1) Zakonom o izmirenju obaveza po osnovu računa stare devizne štednje emisijom obveznica u Brčko distriktu Bosne i Hercegovine (u daljnjem tekstu: Zakon) propisuje se postupak, način i rokovi izmirenja obaveza Brčko distrikta Bosne i Hercegovine (u daljnjem tekstu: Distrikta), po osnovu računa stare devizne štednje deponovane u domaćim bankama na području Distrikta.

(2) Izmirjenje obaveza po ovom zakonu zasniva se na lokaciji svakog depozita u banci, njenim poslovnicama ili najnižim operativnim jedinicama koje su poslovale na području Distrikta.

Član 2 (Računi stare devizne štednje)

(1) Računi stare devizne štednje su devizna sredstva s pripadajućom kamatom sa stanjem na dan 31. 12. 1991. godine, kod banaka na području Distrikta i to: Jugobanka Sarajevo, poslovnica Brčko i Privredna banka Sarajevo, poslovnica Brčko.

(2) Sredstva iz stava 1 ovog člana su umanjena za direktne isplate banke nakon 31. 12. 1991. godine, za prenesena i iskorištena sredstva s jedinstvenog računa u Federaciji Bosne i Hercegovine i jedinstvenog privatizacionog računa u Republici Srpskoj i Distrikta i za isplate izvršene poslije 31. 12. 1991. godine po drugoj osnovi.

Član 3 (Kamata)

(1) Obračunata i neisplaćena kamata na sredstva iz člana 2 stava 1 ovog zakona od 1. 1. 1992. godine se u postupku verifikacije stornira, a u skladu sa Zakonom o izmirenju obaveza po osnovu računa stare devizne štednje (Službeni glasnik BiH, brojevi: 28/06; 76/06 i 72/07, u daljnjem tekstu: Zakon o izmirenju obaveza).

(2) Od 1. 1. 1992. godine do stupanja na snagu Zakona o izmirenju obaveza vrši se novi obračun kamata po godišnjoj stopi od 0,5%.

DIO DRUGI – VERIFIKACIJA

Član 4 (Verifikacija i gotovinska isplata)

Verifikacija potraživanja po osnovu računa stare devizne štednje i gotovinska isplata vrši se u skladu sa Zakonom o izmirenju obaveza i Pravilnikom o postupku verifikacije potraživanja i gotovinskih isplata po osnovu računa stare devizne štednje u Brčko distriktu BiH (u daljnjem tekstu: Pravilnik).

Član 5 (Rok za verifikaciju)

(1) Postupak verifikacije potraživanja završit će se najkasnije do 31. 12. 2010. godine.

(2) Obaveze po osnovu računa stare devizne štednje koje nisu verifikovane mogu se dokazivati i ostvarivati samo u sudskom postupku, u skladu sa odredbama Zakona o izmirenju obaveza.

DIO TREĆI - EMISIJA OBVEZNICA

Član 6 (Obveznice stare devizne štednje)

Obveznice stare devizne štednje (u daljnjem tekstu: obveznice) su neograničeno prenosivi papiri od vrijednosti, emitovani u seriji i u nematerijalizovanom obliku – elektronskom zapisu, na osnovu kojih vlasnici obveznica imaju pravo na naplatu glavnice i kamate u skladu s ovim zakonom i odlukom Skupštine Brčko distrikta Bosne i Hercegovine (u daljnjem tekstu: Skupština) o emisiji obveznica.

Član 7 (Izmirivanje obaveza putem obveznica)

(1) Obaveze po osnovu računa stare devizne štednje, koje nisu izvršene isplatom u gotovini u skladu s odredbama Zakona o izmirenju obaveza i Pravilnika, izmiruju se putem obveznica.

(2) Izuzetno od odredbe iz stava 1 ovog člana, obaveze za iznose koji ne prelaze 100,00 KM, neće se izmiriti emisijom obveznica, nego će se ti iznosi isplatiti u gotovini.

(3) Za račune stare devizne štednje koji su verifikovani do 31. 12. 2008. godine obveznice će se emitovati u skladu s ovim zakonom i odlukom o emisiji obveznica.

(4) Obaveze po osnovu stare devizne štednje koje su verifikovane nakon 1. 1. 2009. godine, a nisu isplaćene u gotovini, izmiruju se sukcesivno emisijom obveznica sa istim ili različitim datumima emisije, pod uslovom emisije iz člana 8 ovog zakona.

Član 8 (Uslovi emisije obveznica)

Distrikt emituje obveznice pod sljedećim uslovima:

- a) vrsta obveznice: dugoročna obveznica s kamatnim **prinosom** (kuponom), na ime;
- b) nominalna vrijednost jedne obveznice: jedna konvertibilna marka;
- c) nominalna vrijednost emisije: utvrđuje se odlukom o emisiji obveznica;
- d) datum emisije: 1. juni, a najkasnije 30. juni 2009. godine;
- e) krajnji rok dospjeća: šest godina od dana emisije;

- f) kamatna stopa: fiksna, 2,5 % godišnje.

Član 9 (Postupak emisije obveznica)

Postupak emisije obveznica obuhvata:

- a) donošenje odluke o emisiji obveznica i
b) upis obveznica na račune vlasnika obveznica kod Komisije za papire od vrijednosti Brčko distrikta BiH (u daljnjem tekstu: Komisija).

Član 10 (Odluka o emisiji obveznica)

(1) Odluka o emisiji obveznica obavezno sadrži:

- a) opće podatke o emitentu;
b) datum donošenja odluke o emisiji obveznica;
c) tip emisije;
d) redni broj emisije, oznaku vrste i klase obveznica;
e) broj, nominalnu vrijednost obveznica, kao i ukupnu vrijednost emisije;
f) dospijeće, visinu kamate, način i rokove za isplatu glavnice i kamate;
g) ukupan broj i vrijednost do sada emitovanih obveznica iste klase,
h) prava i ograničenja prava sadržanih u obveznici;
i) podatke o uvrštenju obveznica na službeni [berzu](#) tržišta u Bosni i Hercegovini;
j) način obračuna i utvrđivanja kamate po rokovima dospijeća;
k) podatke o licu ovlaštenom za provođenje odluke o emisiji i
l) druge elemente bitne za provođenje ovoga zakona.

(2) Sastavni dio odluke o emisiji obveznica je i otplatni plan kojim se utvrđuju rokovi otplate glavnice i kamate.

(3) Odluku o emisiji obveznica donosi Skupština, na prijedlog gradonačelnika Distrikta u roku od 45 dana od dana posljednjeg gotovinskog izmirenja obaveza po osnovu računa stare devizne štednje.

(4) Odluka o emisiji obveznica objavljuje se u Službenom glasniku Brčko distrikta BiH i u tri dnevna lista dostupna na području BiH.

Član 11 (Poslovi emisije obveznica)

(1) Poslove po osnovu emisije obveznica obavlja Direkcija za finansije Brčko distrikta BiH (u daljnjem tekstu: Direkcija).

(2) Direkcija će u roku od 30 dana od dana stupanja na snagu ovoga zakona donijeti propise kojima će se bliže urediti način vršenja poslova po osnovu emisije obveznica.

Član 12 (Bezuslovnost, ravnopravnost, otkup i dospijeće obveznica)

(1) Obveznice predstavljaju direktnu i безусловnu obavezu Distrikta, međusobno su ravnopravne i najmanje su u istom rangu sa svim drugim sadašnjim i budućim obavezama za čije izvršenje sredstva osigurava Distrikt.

(2) Distrikt može otkupiti obveznice na tržištu ili na drugi način, u skladu sa odlukom Vlade Brčko distrikta BiH (u daljnjem tekstu: Vlada), pod uslovom da, u slučaju kupovine javnom ponudom, takva ponuda bude jednako dostupna svim vlasnicima obveznica.

(3) Vlasnik obveznice ne može tražiti prijevremeno dospijeće obveznice niti je proglasiti dospelom i plativom prije njezinog dospijeća.

Član 13 (Podnošenje zahtjeva za registraciju obveznica)

(1) Direkcija je dužna u roku od osam dana od dana donošenja odluke o emisiji obveznica podnijeti zahtjev za registraciju obveznica Komisiji.

(2) Uz zahtjev za registraciju obveznica, Direkcija dostavlja odluku o emisiji obveznica i izvještaj o obavezama po osnovu računa stare devizne štednje koje se izvršavaju emisijom obveznica, a koje su verifikovane u skladu s odredbama Zakona o izmirenju obaveza i Pravilnikom.

(3) Izvještaj iz stava 2 ovoga člana izrađuje se na osnovu pojedinačnih i zbirnih izvještaja o izvršenom verifikovanju potraživanja koje izrađuje Agencija za posredničke, informatičke i finansijske usluge, a.d Banja Luka – Poslovna jedinica Brčko (u daljnjem tekstu: APIF) i dostavlja Direkciji, a sadrži:

- a) ime, ime jednog roditelja, prezime i jedinstveni matični broj (ili drugi identifikacioni broj za nerezidenta) lica, koje će postati vlasnik obveznice;
- b) broj obveznica i ukupnu vrijednost obveznica koje će pripasti svakom vlasniku obveznica;
- c) broj bankarskog tekućeg računa vlasnika obveznice preko kojeg se primaju uplate na ime kamate i glavnice i naziv banke kod koje je račun otvoren;
- d) adresu prebivališta vlasnika obveznice i druge podatke u skladu s aktima Komisije.

(4) Za tačnost podataka u pojedinačnim i zbirnim izvještajima o izvršenom verifikovanju potraživanja iz stava 3 ovoga člana odgovara APIF.

(5) Pravo vlasništva nad obveznicama i pravo raspolaganja stiče se danom upisa obveznica kod Komisije.

(6) Distrikt se ne upisuje u registar emitenata kod Komisije.

Član 14 (Registracija obveznica i vođenje računa)

(1) Na osnovu zaprimljene odluke o emisiji obveznica i zahtjeva za registraciju obveznica sa izvještajem iz člana 13 stava 2 ovoga zakona Komisija je dužna:

- a) registrovati emisiju;
- b) otvoriti i voditi račune vlasnika obveznica;
- c) izvršiti registraciju i čuvati podatke o sticanju vlasništva i pravima iz obveznica;
- d) izdavati izvještaje, izvode i potvrde o stanju i promjenama na računima vlasnika obveznica, u skladu s propisima koji uređuju tržište papira od vrijednosti i aktima Komisije.

(2) Komisija je dužna obavijestiti službena berzovna tržišta u BiH o registraciji obveznica.

(3) Na osnovu izvještaja Komisije, obveznice emitovane u skladu sa ovim zakonom uvrstavaju se na službena berzovna tržišta u BiH.

(4) Na trgovanje obveznicama na sekundarnom tržištu primjenjuju se propisi kojima se uređuje tržište papira od vrijednosti.

Član 15

(Troškovi otvaranja računa i izdavanja prvog izvoda o vlasništvu nad obveznicama)

Distrikt snosi troškove Komisije po osnovu:

- a) otvaranja računa vlasnika obveznica;
- b) registracije emisije;
- c) izdavanja vlasniku obveznice prvog izvoda o vlasništvu nad obveznicama u emisiji obveznica, izvršenoj u skladu s ovim zakonom.

Član 16

(Osiguranje sredstava za izmirenje obaveza)

(1) Sredstva za izmirenje obaveza, po osnovu emisije obveznica, osiguravaju se iz sredstava budžeta Distrikta.

(2) Sredstva na ime kamata i glavnice obveznica, Direkcija će isplatiti vlasniku obveznica, bez odbitaka na ime naknade i drugih troškova.

DIO ČETVRTI - PRIJELAZNE I ZAVRŠNE ODREDBE

Član 17

(Izvršenje sudskih presuda)

(1) Sudovi su dužni dostaviti Direkciji izvršne sudske presude po osnovu računa stare devizne štednje, radi izvršenja.

(2) Presude iz stava 1 ovoga člana mogu dostaviti i potražioc.

(3) Izvršenje presuda iz stava 1 ovoga člana vrši se u skladu s članom 1 stavom 2 ovoga zakona i u visini predviđenoj na određenoj poziciji budžeta i u skladu sa Zakonom o izvršenju budžeta Brčko distrikta BiH.

Član 18

(Stupanje na snagu)

Ovaj zakon stupa na snagu osmoga dana od dana objavljivanja u Službenom glasniku Brčko distrikta BiH“.

Broj:01-02-78/09

Brčko, 10. juna 2009. godine

PREDSJEDNIK
SKUPŠTINE BRČKO DISTRIKTA BiH
Mirsad Đapo, dipl. pravnik, s.r.